



Værlandet og Melværet storvald v/Anders Braanaas
Soknavågsvegen 14
6986 VÆRLANDET

Saksbehandlar, innvalstelefon
Johannes Anonby, 5764 3125

Dispensasjon for hjortejakt i Sørværet naturreservat i Askvoll kommune i 2021

Jaktlaget/storvaldet får på nærare vilkår løyve til hjortejakt i Sørværet naturreservat i tida f.o.m. 15. oktober t.o.m. 15. november 2021

Vi viser til søknad frå dykk 22.9.2021 om hjortejakt 15.10.-15.11. i Sørværet naturreservat i Askvoll.

Søknaden, med bakgrunn

Hjortestammen på Værlandet er stabil, med eit uttak på 15 dyr årleg dei siste åra. På grunn av pågåande uttak av sitkagran på Værlandet er det denne sesongen vanskeleg å drive jakt på andre delar av øya enn i naturreservatet. Jakta i naturreservatet vil skje i samråd med føretaket Sørværet Villsau som har beite i området, og for dei er det ein føremon at det vert jakta hjort i naturreservatet slik at tettleiken av hjort kan reduserast der, m.a. for å redusere faren for hjernemakk (Elaphostrongylus). Dette er ei gruppe som er parasittar på ville hjortedyr, og dei kan smitte sau.

Det vil ikkje bli nytta hund i jakta. Jakt vil bli utført som snikjakt, eller ved eit organisert jag med jegerar på post. Jag vil bli utført ved at folk går roleg gjennom området utan unødige støy og uroing av anna dyre- og fugleliv.

Heimelsgrunnlag

Jakt er forbode i Sørværet naturreservat, og verneforskrifta har ikkje eigne unntaksreglar for dette. Søknaden må difor vurderast opp mot dispensasjonsheimelen i naturmangfaldlova § 48, som i 1. ledd seier at forvaltingsstyresmakta kan gjere unntak frå eit vernevedtak "*dersom det ikke strider mot vernevedtakets formål og ikke kan påvirke verneverdiene nevneverdig,*". Verneformålet er, i følgje verneforskrifta pkt. III "... å ta vare på eit viktig skjergards- og våtmarksområde med naturleg tilhøyrande vegetasjon og dyreliv. Det er særleg viktig å verne om området sine mange funksjonar for fuglelivet, og myrområda som naturtype. I tillegg er det viktig å ta vare på dei geologiske verneinteressene knytta til devonsk sandstein."

Som for andre avgjerder som vedkjem naturmangfaldet, må Statsforvaltaren også gjere greie for korleis søknaden er vurdert i høve til naturmangfaldlova §§ 8-12 (jf. § 7).



Vår vurdering

Dåverande Fylkesmannen i Sogn og Fjordane gav fleire gonger løyve til hjortejakt i Sørværet naturreservat. Kunnskapsgrunnlag og vurderingar er i all hovudsak dei same i dag som for løyva som vart gjevne tidlegare, seinast i brev frå Fylkesmannen i Sogn og Fjordane 27.9.2012. Som i 2012 er kunnskapsgrunnlaget tilstrekkeleg til å konkludere at hjortejakta ikkje inneber risiko for nemnande skade på naturmangfaldet (jf. naturmangfaldlova §§ 8 og 9). Når det gjeld økosystem-tilnærming og samla belastning (naturmangfaldlova § 10) vil jakta ikkje ha nokon direkte påverknad, negativ eller positiv, på naturtypene kystmyr eller kystlynghei. Indirekte er det derimot positivt for kystlyngheia som utvald naturtype at redusert tettleik av hjort vil redusere fare for sjukdom på sauene som er viktige for skjøtsel av lyngheia. Sidan hjortestammen i fråvær av naturlege predatorar truleg er unaturleg høg regionalt, noko som fører til beiteskade på ein del lauvtreartar som er viktige for naturmangfaldet, er det også generelt positivt for naturmangfaldet å halde jakttrykket på hjort oppe. Vi meiner hjortejakta som det er søkt om i naturreservatet på ein god måte stettar kravet i naturmangfaldlova § 12 om miljøforsvarlege teknikkar og driftsmetodar. Tiltaket strir ikkje mot verneføremålet, og kan ikkje påverke verneverdiane nemnande.

Avgjerd

Med tilvising til naturmangfaldlova § 48 gjev Statsforvaltaren med dette løyve til jakt på hjort i Sørværet naturreservat, med følgjande vilkår:

- Jakta er avgrensa til tida frå og med fredag 15. oktober til og med måndag 15. november.
- Jakta er avgrensa til sjølve Værøyna, og gjeld altså ikkje andre holmar og skjer i naturreservatet.
- Det skal ikkje bringast andre skytevåpen inn i reservatet enn det som er lovleg for hjortejakt.
- Jakta skal skje med rimeleg varsemd, så ein unngår unødig slitasje og uroing i reservatet.
- Innan årsslutt skal det sendast kortfatta rapport til Statsforvaltaren, med opplysningar om korleis jakta har arta seg og kor vellukka ho har vore, og andre ting som jegerane har lagt merke til eller ønskjer å kommentere.
- Løyvet er avgrensa til året 2021.

Tiltakshavar har ansvar for at jakta skjer i samsvar med reglane i viltlova.

Klagerett m.m.

Denne avgjerda kan klagast inn til Miljødirektoratet av partar i saka eller andre som har rettsleg klageinteresse. Eventuell klage skal sendast til Statsforvaltaren, som også kan gje nærare opplysningar om klagerett og rett til å sjå saksdokument.

Med helsing

Stein Byrkjeland
fagdirektør

Johannes Anonby
seniorrådgjevar

Dokumentet er elektronisk godkjent

Kopi til:

Askvoll kommune
Statens naturoppsyn v/Einar Vereide

Postboks 174 6988 ASKVOLL